

TEZAUUR LITURGIC
7 OCTOMBRIE

SLUJBA
SF. IERARH
IONA
POKROVSKI,
EPISCOPUL
HANKOVULUI



MINEIUL PE OCTOMBRIE
MOSCOVA



Месяца октября в 7-й день Святителя Ионы, епископа Ханькоуского

На велицей вечерни

На Господи, возвах: стихиры на 6, глас 6.

Подобен: Все отложше:

Похвало Козельска и Калуги славо,/ Казанскаго вертограда богословия украшение/ и Маньчжурии пастырю предобрый,/ вся концы отечествия и разсеяния русскаго/ веселия божественнаго исполняеши,/ житием бо и писании твоими утешаеши/ и спасения надежду подаеши,/ изнемогших от язв греховных благодати причащаеши/ теплым предстательством твоим,/ богомудре Ионо, святителю Христов.

Похвальную песнь вопием ти,/ иже о Дусе Божественном славный учителю,/ Писаний Божественных сказателю предивный/ и суемудренных обличителю доброумный,/ аще и словесы твоими насладихомся,/ обаче в небрежении доселе пребываем,/ но молися о нас, богогласный Ионо,/ да и житием последуим благим учением,/ имиже от тебе наставлени быхом.

Святое восприим пострижение,/ богоносе
Ионо,/ в Оптину пустынь вселился еси/ и, тамо
в сердце своем слагая/ премудрых старцев
глаголы,/ Христовым разумом обогатился еси./
Темже вси песньми восхваляем светлыя труды
твоя,/ имиже паству твою наставил еси,/
нравом отцем Оптинским подобниче.

Возвеселися и возрадовася Русь, во
изгнании сущая,/ в ней бо многосветлую свещу
возжже Христос,/ богомудраго Иону святителя,/
во стране Маньчжурстей иноверных и
отчужденных от жизни Божия/ добродетельным
житием привлекашаго./ Того молитвами, Христе
Боже,/ низпосли нам велию милость.

Христова Евангелия/ верный исполнитель
быв,/ отче преподобне Ионо,/ взалкавшимися
дал еси ясти,/ возжадавшихся напоил еси,/
больных же и в темнице заточенных посетил
еси./ О, святе Ионо,/ Владыку всех моли,/
спастися нам в День судный.

Слава, глас 3:

Отче Ионо,/ иерарху Новаграда
тезоимените,/ в житии тому подобниче/ и
сырых предстателю!/ Якоже бо той, скорбь
сиротства познав,/ врученное ти стадо добре
упасл еси,/ отечески его снабдевая,/ тем и по
смерти сияеши чудесы./ С нимже молися

Господеви/ спасти и просветити/ верно
совершающих досточудную память твою.

И ныне, Богородичен, догматик, глас тойже.

Вход. Прокимен дне.

Чтения три святительская.

На литии стихиры, глас 4:

Любовию к Богу и людям движимый,/ отче
преподобне Ионо,/ со воины Христовы вменился
еси, духовно наставляя их,/ душою возстав
супротив врага мысленного./ Наченшейся же
брани братоубийственной,/ ты, яко иерей
Божий,/ защититель веры и ближняго
благодержновенно явился еси,/ душу свою за
други полагая,/ словесы и ученьми утешая/ и
образом жития твоего согревая.

Проповедует тя Церковь Божия/ стража
верна овец словесных,/ ихже ты в безгодие и
дни треволнений мудре упасл еси,/ в вере до
конца соблюл еси/ и в молитве за них
жертвеннику Господню предстоял еси./ Темже,
святителю отче Ионо,/ тако просветися свет
твой пред человеки,/ иже, видевше добрая дела
твоя,/ прославиша Отца нашего Небеснаго.

Слава, глас тойже:

Верен Богу и Церкви был еси даже до смерти,/ святче Ионо,/ ныне же со святыми, в земли Русской просиявшими,/ моли Господа о спасении всех,/ благочестно чтущих память твою.

И ныне, Богородичен, глас тойже:

Бысть чрево Твое святая трапеза,/ имущая Небеснаго Хлеба, Христа Бога нашего,/ от Негоже всяк ядый не умирает,/ якоже рече всех, Богородительнице, Питатель.

На стиховне стихиры, глас 5.

Подобен: Радуйся, Живоносный Кресте:

Радуйся, отче Ионо,/ благочестия крепкое утверждение,/ отеческих преданий неусыпный хранителю,/ падших кроткий и милостивый обличителю,/ о чадах же своих молитвенниче/ и предстателю пред Господом усердный,/ Емуже ныне во славе предстоиши,/ поминай нас, любовьию чтущих память твою.

Стих: Честна пред Господом/ смерть преподобных Его.

Радуйся, отче Ионо,/ иерарше Божий изрядный,/ правило веры и доброделания,/ таков подобаше архиерей нам:/ преподобен, честен, незлобив,/ человеком удобоприступный и верный служитель Христов,/ Емуже ныне во

славе предстоиши,/ поминай нас, любовию
чтущих память твою.

Стих: Что воздам Господеви о всех,/ яже
воздаде ми.

Радуйся, отче Ионо,/ благосердый плач о
пастве изгнанней восприемый,/ скорбь о ней в
сердцы твоем носивый,/ под крестом служения
ближним не изнемогий,/ но о чадах Руси Святыя
со умилением Христу моливыйся,/ многими
слезами Господа на милость приклонивый,/ Емуже
ныне во славе предстоиши,/ поминай нас, любовию
чтущих память твою.

Слава, глас 6:

Днесь беззаконнующии умолчаша/ и
ненавистницы Церкви Христовы
посрамишася,/ малое же стадо дерзает/ и
паства, во отечествии и в разсеянии сущая,
светло красуется/ в божественной памяти
святителя Ионы./ Темже и мы вопием ему:/
даруй и нам благословение твое, отче,/ крест
свой носить достойно/ и, стезею твоею
шествующе неуклонно,/ славу Небесную с тобою
улучити.

И ныне, Богородичен, глас тойже: Творец и
Избавитель мой:

Тропарь, глас 4:

Пастырь добрый был еси русским людям,/
пристанище обретшим во стране чуждей,/ всяко

наставляя их,/ наипаче же любви Христовой,/ образ ея во всем показуя,/ темже, святителю отче Ионо,/ моли Христа Бога спастися душам нашим.

На утрени

По 1-м стихословии седален, глас 1:

Тайну любви Божия познав, святителю Ионо, глагола еси:/ подвиг есть жизнь за иныя положить,/ юже всю Христу Богу предал еси./ Молися о спасении душ наших.

Слава: Яко многоценный дар прият дальний град Маньчжурский/ святые мощи твоя, ханькоуский светильниче,/ мир же весь, благодатию от тебе исходящею, напоется, воспевая:/ радуйся, отче Ионо, молитвенниче о душах наших.

И ныне: Упование христиан, Пресвятая Дево,/ Егоже родила еси Бога, паче ума же и слова,/ непрестанно моли с Вышними Силами,/ подати оставление грехов наших и исправление жития,/ присно Тя славящим.

По 2-м стихословии седален, глас 6:

Пастырь добрый и наставник предивный пастве был еси, святителю Ионо,/ сего ради и мы, яко великому светильнику Церкви нашея, хвалу ти воспеваем и взываем:/ моли Христа

Бога, грехов оставление даровати/
празднующим любовью святую память твою.

Слава: Со тщанием в винограднике
Христовом потрудився, святителю Ионо,/
добрыя плоды добродетельми взрастил еси,/
души бо паствы твоея, в точиле гонений и
изгнания сокрушенныя,/ доброе вино
искапаша./ Темже Господь твой возрадовася.

И ныне: Недвижимое утверждение веры и
честный дар душ наших,/ Богородицу песньми
величаем, вернии:/ радуйся, Жизнь Ипостасную
во чреве Твоем вместившая;/ радуйся,
скорбящих заступление;/ радуйся, Богомати
Пречистая.

По полиелеи седален, глас 2:

Святителю Христов и угодниче Ионо,/
теплым твоим предстательством отроки и юныя
во ограде церковней соблюди,/ да не омрачатся
развращением мира сего/ и всяким лжеучением
волков лютых да не уловлены будут.

Слава, и ныне, Богородичен:

Радуется ныне Иоанн, святитель
Тобольский,/ в землю китайскую первых
проповедников православия пославый,/ идеже
и славный сродник его прославися./ Радуется и
Иннокентий, светильник Иркутский,/
благовестником веры Христовыя в стране

дальней споспешник. / Радуются первомученицы
Китайстии, даже до крове за Христа
пострадавшии. / Егоже молят с
Преплагословенною Богородицею присно
согрешений оставление даровати, /
воспевающим достойно новаго угодника Его.

Степенна, 1-й антифон 4-го гласа. Прокимен,
глас 4: Честна пред Господем / смерть
преподобных Его. Стих: Что воздам Господеви о
всех, яже воздаде ми? Всякое дыхание:
Евангелие от Матфеа, зачало 11.

По 50-м псалме стихира, глас 6:

Песньми воспоим хвалу святителю Божию
Ионе, / единому от тех, ихже мир недостоин бе, /
иже воистину христианским житием / верность
Христу показаша, / терпением велиим злаго
врага посрамиша / и смирением своим гордость
его низложиша.

Канон святителя на 8, глас 6.

Песнь 1

Ирмос: *Яко по суху пешешествовав Израиль /
по бездне стопами, / гонителя фараона / видя
потопляема, / Богу победную песнь / поим,
вопяше.*

Припев: Святителю отче Ионо, моли Бога о нас.

Твоему, Христе, угоднику хвалу достойну воспети даруй ми, Владыко,/ от устен нечистых и разума помраченна,/ и молитвами его воздвигни от расслабления греховнаго душу мою.

Казанския земли украшение преславное явился еси, отче Ионо,/ служением пастырства и учительства подвигся,/ темже, светом евангельским юныя просвещая,/ мрак неведения далече от них отгнал еси.

О, гласа плача твоего, блаженне Ионо, о людех Руси, во отечествии и в разсеянии сущих!/ Имже и нас покаянию и исправлению научаеши/ и из сердца окаменевшаго слезы изводиши,/ якоже древле Моисей из камене воду,/ да вси с ним зовем Богу, спасающему нас:/ славно бо прославися.

Богородичен: Честная икона Твоя Казанская, Владычице Богородице,/ Отечеству нашему в покров и заступление даровася,/ яко любвию Твоею сие присно озаряеши, Заступнице Усердная./ Темже и к жизни духовней, в Бозе сокровенней,/ люди Твоя недостойныя управи.

Песнь 3

Ирмос: *Несть свят,/ якоже Ты,/ Господи,
Боже мой,/ вознесый рог верных Твоих, Блаже,/*
и утвердивый нас на камени/ исповедания
Твоего.

Язык твой, Духом Божественным
движимь,/ воистину трость книжника явися,/
скажет бо преславно Писаний сокровенная и
отеческих словес потаенная,/ еретичествоующих
и безбожных писания посрамляет,/ веселит же
духовно поющая всечестную память твою,
святителю Ионо.

Яко апостолом и отцем древним наследник
истинный,/ исповедание правое веры добре
свидетельствовал еси/ и, во учительстве
подвизаяся,/ юныя ученики твоя укреплял еси/
в ветрах суемудрий не влаятися отнюд,/ обаче к
свету Божественных догматов взирати.

Явился еси древних отцев жития
подражатель истинен,/ служением ближним
делание молитвенное растворив,/ во обою же
страхом сыновним Господеви предстоя,/
усыновление же и обожение во Христе улучил
еси.

Богородичен: *Аще и оскудеша во дни*
последняя наставницы духоноснии,/ но Ты,
Пречистая Владычице, Сама Наставница ко
спасению рабом Твоим буди,/ смолебники

приимши отцы богомудрыя,/ ихже писаньми
назидаемся.

Седален, глас 5:

Веры ради ят быв,/ в темницу всажден был
еси,/ но Бог ин путь тебе предначерта,/
русским людем во благая./ Темже молим тя:/
моли Христа Бога нам в вере утвердиться/ во
спасение душ наших.

Слава, и ныне, Богородичен:

Сладосте ангелов, скорбящих Радосте,/
христиан Предстательнице, Дево, Мати
Господня,/ заступи ны от всякия напасти и
спаси души наша.

Песнь 4

Ирмос: *Христос моя Сила,/ Бог и Господь,/*
Честная Церковь/ боголепно поет, взывающи,/
от смысла чиста о Господе празднующи.

Отеческих писаний хранитель и
исполнитель тех, святителю Ионо, явился еси,/
ихже юношам благоговейне преподавал еси,/
богоугодным же житием силу словес их явил еси.

Христово смирение стяжав и мужеством
препоясан,/ исходиши на служение ново/ и, яко
лев, уповая на Господа,/ пред скимны
рыкающими право ходил еси.

Единаго Сущаго на Небесех паче всякаго
страха убоявся,/ Тому Единому всяким
усердием поработал еси/ и, коварствия
богоборцев оплевав,/ со Христом, Победителем
смерти, навеки воцарился еси.

Богородичен: На Тя всю надежду спасения
нашего возложихом, Богомати
Неискусобращная,/ на помощь присно
призываем Тя:/ спаси ны от напастей и печали/
и вечнаго осуждения избави.

Песнь 5

Ирмос: Божиим светом Твоим, Блаже,/ *утренюющих* Ти души/ *любвию* озари,
молюся,/ Тя *ведети*, Слове Божий,/ Истиннаго
Бога,/ *от мрака греховнаго* *взывающа*.

Милостию к скорбящим украсился еси,/ *раздавая* алчущим хлеб твой,/ болящим же
всеусердно послужил еси/ словом пастырским,
молитвою и увещанием.

Град Москва хвалится юностью твоею,/ *Калуга* же и *Казань* учением твоим, *Оптина*
пустынь монашеством,/ но паче всех
Маньчжурия тобою славится,/ яко пастырем
ревностным и предстоятелем любвеобильным.

Возлюбил еси Господа и всею крепостию
Тому поработал еси,/ *многи скорби претерпевая*,

души многих, святителю, ко Христу наставил еси./ Емуже молися спастися нам.

Богородичен: Просвети, Дево Чистая, любовию чтущих Тя и величающих,/ разреши страсти наша,/ устави их бурю и лукаваго соблазны от среды нашея отжени/ молитвами Твоими.

Песнь 6

Ирмос: *Житейское море/ воздвизаемое зря напастей бурю,/ к тихому пристанищу Твоему притек, вопию Ти:/ возведи от тли живот мой,/ Многомилостиве.*

Богоборцем и иноверным верою крепкою, святителю, противустал еси,/ паству твою от волков губительных оградити тщася,/ гнева злобствующих никакоже убоялся еси,/ ниже осуждения человеческого.

Долготерпению твоему Небеса и земля подивишася,/ яко в самых когтах звериных плотию держимь,/ не престал еси уповати на Господа и возвещати истину Его,/ преславно тя, якоже пророка от чрева китова, свободившаго.

Святительства истинного образ был еси,/ страстей взыграния первее обуздав на страже сердца твоего,/ темже и овцы Христовы ко пристанищу небурному мудре управил еси.

Богородичен: Истины свидетелие и Сына
Твоего служителие вернии/ на Тя, Богомати,
упование свое возложиша/ и, под кровом Твоим
сохраняеми,/ на огонь и смерть дерзаху./ Ихже
молитвами и нас укрепи, Владычице наша
Всепетая.

Кондак, глас 3:

Детем не возбрания еси приходи к тебе,
богоблаженне,/ пекийся о насущных их,/ и
храмину им создал еси,/ по кончине же твоей
сих не оставил еси,/ отрока бо разслабленна в
сонном видении исцелив./ Сего ради вопием
ти:/ радуйся, чудодейственниче Ионо
преславный.

Икос:

К Богу и людям стяжав любовь истинную и
нелицемерную, святителю,/ да любите друг
друга, детем взывал еси,/ имже образ был еси
словом и житием, любовью, духом, верою и
чистотою./ Сего ради чудотворения многа и
знамения Божия силы верным о тебе явишася/
и, со безплотными ныне ликовствуя, неотлучен
от чад своих пребываеши./ О, сопричастниче
святым!/ От бесовских насилий своим
предстательством нас огради/ и к Горней любви
сердца уязви, благодарственно тя

воспевающих:/ радуйся, чудодейственниче
Ионо преславный.

Песнь 7

Ирмос: Росодательну убо пещь/ содела
Ангел/ преподобным отроком,/ халдеи же
опаляющее,/ веление Божие мучителя увеща
вопити:/ благословен еси, Боже отец наших.

Воин Христов непобедимъ показался еси,/
противу безбожных твердым исповеданием
вооружився/ и отступльшим палицею словес
твоих противустав,/ венцем исповедника от
Господа увенчался еси.

Единаго на потребу усердно взыскав,/
жития сего сластями не прельстился еси,/ темже
и поставляет тя на свещнице архиерейства
Господь,/ да светонаставник будеши людям Его.

Днесь, верная овчата Христова, пастыря
добраго прославляем,/ пред овцами своими
дерзновенно ходившаго/ и тех по имени
глашавшаго/ и ко обителем Небесным дивно
наставльшаго.

Богородичен: Поем Тя, Богоневесто, Мати
Христа Бога,/ славяще Рождество Твое
непостижимое,/ Имже избавихомся от всякия
беды, Владычице,/ и верно вопием:/ помилуй
стадо Твое, едина Всепетая.

Песнь 8

Ирмос: Из пламене преподобным росу
источил еси/ и праведнаго жертву водою
попалил еси:/ вся бо твориши, Христе, токмо
еже хочети./ Тя превозносим во вся веки.

Радости присносущныя надеждою
препоясався,/ терпением в подвиг
страдальческий вшел еси,/ темже не посрами
Господь упования твоего,/ с лики святых
сочетах тя, поющего:/ благословите, вся дела
Господня, Господа,/ пойте и превозносите Его
во веки.

Елицы Писаний Божественных разумение
приясте,/ приидите, купно восхвалите тех
сказателя богомудраго Иону,/ вопиюще устом
его слово Подавшему:/ благословите, вся дела
Господня, Господа,/ пойте и превозносите Его
во веки.

Воистину ни един же от малых сих забвен
бысть у тебе, блаженне Ионо,/ ко всем бо любви
твоя распрострется,/ нищим и простецем,
наипаче же сирым и убогим./ Темже и днесь
источник неоскудевающий слова Божия нам
отверзаеши, взывающим:/ благословите, вся
дела Господня, Господа,/ пойте и превозносите
Его во веки.

Богородичен: Аще и отечества земнаго
лишение попущением Божиим прииде верным

Твоим,/ обаче явилася еси милостивая
 Утешительница им в знамении обновления икон
 Твоих,/ от нихже чудеса источила еси./ Темже и
 мы вопием Ти:/ Небеснаго Отечества
 причастники содейай нас,/ яко Благая
 Вратарница еси, двери райския верным
 отверзающая.

Песнь 9

Ирмос: Бога/ человеком невозможно
 видети,/ на Негоже не смеют чини Ангельстии
 взирати,/ Тобою же, Всечистая, явися
 человеком/ Слово воплощенно,/ Егоже
 величающе,/ с Небесными вои/ Тя ублажаем.

Отче святителю Ионо!/ Ты, кончину свою
 предзря,/ со умилением исходное пение
 приносил еси Владычице, во успении Своем
 мира не оставльшей./ Темже и нас,
 бедствующих скорбьми, не остави,/ венцем
 увязся от Господа нетленным во веки.

Смерти предстоя, кротостию и незлобием
 всех простил еси,/ чадом же твоим, любовь
 Христову простирая,/ дети, да любите друг
 друга, рекл еси./ Темже и нас с высоты славы
 Божия благослови,/ да в единении и любви
 спасемся.

Истинныя славы взыскуя, отче Ионо,/
 тленную и земную ни во что же вменил еси./

Темже и нам коемуждо помози руце
расслабленней на молитву воздети/ и очи
душевней горе возвести,/ да грядущаго во славе
Господа бодренным сердцем усящим/ и славы
Его причастницы будем.

Богородичен: Милостива нам Сына Твоего
покажи, Преблагословенная Мати,/ в час
судный, вернаго угодника Твоего Иону
смолебника и заступника тепла приимши,/ да
грядущаго во славе Господа бодренным сердцем
усящим/ и славы Его причастницы будем.

Светилен:

В песнях достойных почтим славнаго
иерарха Ханькоускаго Иону,/ добродетельми
украшившагося,/ от востока дальняго днесь
возсиявшаго/ и в разсеянии сущих светом
Христовым просветившаго.

Слава, и ныне, Богородичен:

Щедроты Твоя, Боже, на люди и стадо Твое
низпосли,/ молитвами Пречистыя Твоея Матере
и всех святых Твоих,/ и нам даруй велию Твою
милость.

На хвалитех стихиры на 4, глас 1:

В годину гонения люта истинный Христов
служитель показался еси,/ евангельское слово
утверждая,/ воинов назидая и утешая,/ и

благоговейно Господеви принося жертву
безкровную./ Темже вопием ти:/ о, святе
Ионо,/ моли Его от враг видимых и невидимых
нас избавити/ и душам нашим спасение
улучити.

Аще и безмолвствуют горы и пустыни,/ яже
многими скорбьми прошел еси в землю
Китайскую иногда/ с чудотворною иконою
Богоматере Табынския,/ но мы тя прославляем
яко веры наша утверждение/ и Писаний
Божественных изъяснителя,/ иерархов похвалу
и преподобных украшение,/ сирых заступника и
о нищих попечителя,/ исповедника крепкаго/ и
молитвенника теплаго о душах наших.

Исходы твои, отче Ионо,/ исходы живота
показашася,/ се бо, в сонни легцем явився
отроку болящу,/ о пребывающем животе
свидетельствовал еси:/ возьми мои нозе, свои же
подаждь ми, рекл еси ему,/ и удиви вся
исцелением его./ Темже вопием ти:/ молися о
исцелении душ наших.

Рыданием неутешным воздух огласися,/
егда тысящи христолюбцев гробу твоему
предсташа,/ провождающе невольное
шествие твое,/ но не оставил еси сирых чад
твоих,/ молитвою твоею, чудесы и
наставленьми/ утешая и укрепляя души их во
веки.

Слава, глас 6:

Благий и верный рабе,/ добрый делателю
винограда Христова,/ святительство твое во
стране Китайстей дивно бысть:/ данный бо ти
талант преумножил еси/ и воистинну
христианския кончины сподобился еси,/ темже
и во обители райския ангели тя вознесоша./ И
ныне, яко вшедый в радость Господа своего,/
умоли Его, славне Ионо,/ о спасении душ
наших.

И ныне, Богородичен, глас тойже:
Богородице, Ты еси Лоза истинная:

На Литургии

Блаженны от канона песни 3-я и 6-я.
Прокимен, глас 7: Возвеселится праведник о
Господе/ и уповаает на Него. Стих: Услыши,
Боже, глас мой, внегда молити ми ся к Тебе.
Апостол ко Евреем, зачало 335. Аллилуиа, глас 4:
Священницы Твои облекутся в правду и
преподобнии Твои возрадуются. Евангелие от
Луки, зачало 24. Причастен: В память вечную:

**Текст службы утвержден решением
Священного Синода от 28 декабря 2018 года
(журнал № 126).**